

Rikardo Arregi Kazetaritza Mintegia sortu dute EHUK eta Andoaingo Udalak

Euskarazko kazetaritzaren historia ikertzeko urtebeteko beka emango dute laster

Iñaki Petxarroman / Andoain

Rikardo Arregi Kazetaritza Mintegia sortu dute Euskal Herriko Unibertsitateak (EHU) eta Andoaingo Udalak. Mintegiaren helburua euskarazko kazetaritzaren erronka eta arazoak aztertzea izango da, eta lehen lana izango da euskarazko kazetaritzaren historia aztertzea. Horretarako urtebeteko beka emango dute laster.

PELLO SALABURU EHUKo errektoreak eta Jose Antonio Perez Gabarain Andoaingo alkateak sinatu zuten atzo Rikardo Arregi Kazetaritza Mintegia sortzeko akordioa.

Rikardo Arregi Andoaingo kazetari eta idazlearen omenez sortutako ekimenaren helburua da euskarazko kazetaritzaren historia eta egungo erronkak aztertzea.

Mintegiak batzorde eragile bat izango du, Udaleko eta EHUKo Gizarte eta Komunikazio Zientzietako Fakultateko hiruna ordezkarik osatua. Mintegiaren lehen zeregina izango da euskarazko kazetaritzaren historia aztertzea, eta horretarako urtebeteko beka bat emango du laster. Beka lortzen duenak 100.000 pezetako soldata izango du hilero, eta lana egin ahal izango du EHUKo Gizarte eta Komunikazio Zientzien Fakultatean, EHUK behar dituen tresna eta azpiegitura guztiak jarriko baititu bere esku.



Pello Salaburu EHUKo errektorea eta Jose Antonio Perez Andoaingo alkatea, atzoko ekitaldian.

Andoaingo Udalak 1.500.000 pezeta emango ditu azterketa egiteko (60.000 libera inguru), eta, horrez gain, beste milioi bat eman dezake ondoren lana argitaratzeko.

Mintegiak lau urteko iraupena izango du printzipioz, baina luzatu ahal izango da bi aldeek hala erabakiz gero. Historia aztertuko duen beka bukatu ondoren, Batzorde Eragileak deialdi gehiago egin ahal izango ditu.

Pello Salaburu EHUKo errektoreak adierazi zuenez, bekaren bidez euskarazko kazetaritzaren iragana eta geroa lotu nahi dute: iragana historia aztertuko dutelako, eta etorkizuna euskararen normalizazio bidean aurrera egindako beste pauso bat delako lan hori.

Rikardo Arregiren oroimenez

Jose Antonio Perez Gabarain

Andoaingo alkateak adierazi zuenez, ekimen berri hau Rikardo Arregiren oroimenez egiten duten beste bat izango da.

Alkateak gogoratu zuen duela 10 urte sortu zutela Rikardo Arregi Kazetaritza Saria, eta egun onarpen handia duela lanbide horretako profesionalen artean. Sari horrek lortutako ospea handia izan arren, udalak beste pauso bat ematea erabaki duela esan zuen alkateak.

Euskara ikasten ari direnak hartzeko prest dauden familiak izena eman dezakete

■ Gutxienez lau kideko familiak izango dira, eta etxeoko harremanak euskaraz izan behar du

Erredakzioa / Donostia

UDAN euskara ikasten ari diren ikasleak etxean hartu nahi dituzten familiak epea zabalik dute eskaera egiteko. Eskakizunak HABEk Donostian duen bulegoan aurkeztu behar dira, Vitoria-Gasteiz kalean, eta hilabeteko epea dute horretarako.

Egonaldiak familia euskaldunetan proiektuan parte hartzeko familiak gutxienez lau kide izan behar ditu, eta haien artean euskaraz hitz egin behar dute. Gainera, herriak inguru euskaldun batean egon behar du, alegia, herritarren %70 baino gehiagok euskalduna izan behar du.

Egonaldiak uztailean, abuztuan eta irailean izango dira, eta ikasleek apiriletik aurrera eman ahal izango dute izena proiektuan.

Familiak logela bat jarriko dio ikasleari, eta saiatu behar du ikaslea egunero bizi izan integratzen. Hilero 75.000 pezeta jasoko dituzte familiak (3.000 libera).

Informazio gehiago lortzeko HABEren telefonora dei daiteke, alegia, 943-412621. Ipar Euskal Herritik deitzeko, 00-34 aurretik.

Egunkaria -n bisitan



Donostiako Herri Ametsa ikastola - OHO-ko 6. maila